

南宮奏議

南宮奏議卷第二十一目錄

選舉

申明正文體以變士習

議處京闈科舉事宜

正科場文體

增湖廣鄉試解額覆題

題請會試正榜舉人額數

叅看廣東試錄文字

叅看應天府試錄失格

應天府取中生儒乞准送監讀書

應天府生儒乞准今會試

南宮奏議卷第二十一

鈴山堂集六十一

選舉

申明正文體以變士習

臣等竊惟文章與氣運相爲流通而場屋程式之文關係最重蓋所錄之士即他日卿大夫之選主司以言考行以文觀志其文醇正明白根極道理者則其人必端雅他日事業必光明俊偉所謂如青天白日如高山巨谷國家得之則賴以理矣其艱深詭異毀經叛道者則其人必儉邪他日事業必回遘不忠所謂瑣屑如蟣虱糾結如蚓蟻國家用之則胥以殆矣

故文詞之純駁人才之邪正治運之隆替關焉我國
家設科取士之法遠超前古黜詞賦專經術爲文必
以濂洛關閩諸儒傳註爲主百六十年理學大明文
治日昌真才輩出蓋至成化弘治間科舉之文凡會
試及兩京鄉試文字深醇典正炳蔚暢達真所謂治
世之文有以鳴國家之盛者矣近年以來士子所作
文字偏尚奇詭競駕虛詞往往不依經傳本旨原題
起結決裂破碎漫無體制或引用莊列雜書爭相崇
尚以自矜衒其於純正博雅之體優柔昌大之氣蕩
然無有叛理害治莫此爲甚查得嘉靖十一年正月

內該本部尚書夏言題爲科舉事內開正文體以變
士習事請乞力救斯文之弊等因題奉 聖旨是文
運有關國運所係不細近來士子經義詭異艱深大
壞文體誠爲害治恁部裏便出榜曉諭今次會試文
卷務要醇正典雅明白通暢的方許中式如有仍前
鈎棘奇僻痛加黜落甚則令考試官指名具奏處治
欽此已經禁約去後乃昨歲各省進到鄉試錄其文
類皆猥誕不經奇詭相襲背盤經旨決裂程式廣東
錄文尤爲悖謬該臣等叅奏究治外切照今歲會試
開科天下士子投牒就試雲集京師仰惟 聖明御

極方將丕闡人文以化成天下若不痛懲徃習力振
頽風誠恐將來效尤愈趨愈下道術日微人才日壞
欲得人才以輔成治理豈不難哉臣等忝備禮官職
司貢舉攄忠報國以人事君之義莫重於此伏望

聖明采納勅下主考重臣督令同考官員今歲會試
較士務要遵照先奏欽依事理必須醇正典雅明白
通暢合於程式者方許取中其有似前駕虛翼僞鈎
棘軋茁之文如尚書夏言所論者必加黜落仍聽考
試官摘出不寫經傳本旨不循體制及引用莊列背
道不經之言悖謬尤甚者將試卷送出以憑本部指

實奏請除名不許再試庶幾文體可回宿弊可革合
候命下臣等先期出給榜文曉諭應試諸士俾各知
懲革故習恪遵休命庶真才效用而治化可臻矣嘉
靖十七年正月二十七日奉
聖旨是你部裏便出榜曉諭

議處京闈科舉事宜

該河南道監察御史沈一定奏稱增解額釐宿弊以
收實才事臣等竊惟祖宗定制兩畿十三省鄉試
解額各有定數而兩畿生儒之外有國子生諸司歷
事監生歲貢生京衛武學生等項故解額一百三十

五名視各省獨加多焉查得上年該提學御史方一桂條陳科舉事宜本部議准將原額一百名以錄畿內生儒其三十五名錄外省監生各項人士但自選貢法行及累開輸粟之例太學生徒多至三千餘名而諸司歷事監生新到歲貢等項大約將及二千之數一時人才之盛大倍往昔而所取解額尚限於三十五名之數委的額少人多不足以盡天下之才查得景泰四年國子監生徒數多順天府解額增至二百五十名係出一時恩命不爲定例所據御史沈一定具奏前因無非因時變通以廣收人材之意合無

將今次兩京解額各量增數名專以錄外省監生各
項人士庶幾遠近不遺而暇方士子懷才抱藝者咸
得自奮不孤 皇上教育之恩矣其應增之數臣等
未敢擅擬伏乞 聖明欽定臣等又惟京師乃都會
之地順天鄉試起送儒士多有四方緣事黜革生員
潛住京師改名冒籍以圖科舉及至就試之時又有
顧倩熟識頂替入場希圖僥倖奸弊滋多誠有如御
史沈一定所奏者相應禁革合候命下本部劄付順
天府轉行各該衙門今後應試儒士務要查審辯驗
籍貫明白者方許保送其附籍可疑之人取有同鄉

官印信保結正途出身者方許准理入試之時提調
官取具各生并歇家年貌親供互相保結置立文簿
聽監試御史設法審究仍行五城巡視御史并緝事
衙門密切緝訪若有前弊將原保人連坐治罪務要
視常倍加嚴謹以防奸弊其奏要考試官每場公同
提調監試官揭書出題及去取硃卷與同考試官意
見不同者會同提調監試官虚心參酌雖皆爲革弊
防奸之意但 祖宗舊制兩京鄉試簾以內屬之考
試官簾以外屬之提調監試等官不相干預恐致漏
泄事情以故內外職守禁防甚嚴其出題閱卷去取

等項自有場屋相承舊規遵行已久再難別擬况兩
京鄉闈主試俱係朝廷簡命文學侍從之臣事在得
人宜專委任但既該御史具奏前因合候命下本部
行移該衙門轉行兩京考試官務要精白一心恪恭
乃事以仰副 聖明委任求賢之意其提調監試等
官先期嚴加防範臨期着實巡察如考試官去取不
公交通關節事有顯證者聽監試官即時糾舉庶職
守不紊宿弊克清而共成國家賓賢之盛典矣嘉靖
十六年七月初十日奉

聖旨科舉朝廷重事便着提調監試官嚴加防範禁

革奸弊考試官出題閱卷都照舊例行簾外官不許干預解額仍舊不必開增

正科場文體

該河南道監察御史聞人銓題奉 聖旨禮部知道欽此看得正文體以變士習先年節經本部具題通行禁革外今御史聞人銓以來歲當鄉試之期復以爲言蓋本官先年提學南直隸身有教士之責目擊時弊深懲往昔故有此論臣等切惟時文之弊久矣轉移化導之機其要在於司考校之責故知貢舉有歐陽修則軋茁之文自黜今試錄所刻之文士子視

以爲趨向彼見詭異不經之言尚在所錄必曰主司
好尚如此有不靡然倣之者乎如是雖日諄諄告戒
之無益也本官奏稱先責之學校使提督憲臣痛加
黜罰次責之場屋使考試等官公爲品題決不以此
等中式此爲知本之論相應依擬合候命下本部移
咨都察院轉行南北直隸提學御史并浙江等按察
司提學官及各處監臨御史各遵照本部節年題奉
欽依事理刊刻榜文播告多士仰各遵聖訓爲文必
崇尚雅正根據經傳如有仍前收錄叛經離道之文
俟進到試錄本部詳加翻閱查出奏請照例將考試

等官追奪禮幣監臨提調等官一體提問究治庶人皆知警文體可正而士習可端矣嘉靖十八年十二月二十三日奉

聖旨是便通曉告今後鄉試進到試錄你部裏務要詳閱舉奏如再仍有叛經離道詭辭邪說定將監臨考試等官罪黜取中舉人辯驗公據得實革退爲民

增湖廣鄉試解額覆題

看得御史姚虞等題稱湖廣乃龍飛之地人文之盛有非昔比乞要少增解額著爲常例一節臣等切惟

設科取士國家盛典其兩京十三省解額名數多寡具有定制遵行不易惟近歲給事中田秋御史王杏奏稱貴州先年鄉試附搭雲南今要分設科場以備全省之制二省解額乞均賜加增三五名該本部題奉欽依開設科場雲南准增四名蓋亦宜時通變之義也今照御史姚虞饒天民所奏以湖廣爲我皇上飛龍之地府名承天宜比照順天應天事例增其額數臣等查得順天應天解額俱一百三十五名緣兩京有國子監生及各衙門歷事監生禮部儒士太醫院醫士等項四方之人聚焉非皆出自畿內也故

南宮奏請 卷三 一 金
額數視各省爲獨多今以湖廣例之似有不同但二
臣之奏無非欲崇表帝鄉作興士類之意湖廣舊取
八十五名合無於額外量增數名以示優異臣等不
敢擅擬伏乞 聖裁嘉靖十九年七月二十五日奉
聖旨湖廣朕 皇考德化所及之地解額准增足九
十名

題請會試正榜舉人額數

嘉靖十七年會試天下舉人三場已畢該考試官掌
詹事府事太子太保禮部尚書兼翰林院學士顧鼎
臣等送出揭帖取到文理平順堪中正榜者四百二

十五卷文理平通堪備正榜者一百二十三卷擬於
本月二十四日揭曉開送到部臣等切惟人才關乎
世道而惟進士爲重守令切乎親民而惟進士爲良
查得永樂年間會試取士有幾五百名者成化弘治
間多有四百或三百五十名暨我皇上臨御之初
亦嘗取及四百之數況今人材輩出視昔益盛則其
錄用之數自當視昔有加近該本部左侍郎兼翰林
院學士張璧奏要少增額數用網俊髦上副陛下
側席之求下慰多士入彀之望庶幾仰裨聖化巡撫
陝西都御史任忠題稱關陝重地軍民困弊虜患方

張整理振作必須得人乞於進士常數之外量加數
名以爲陝西州縣之用庶州縣得人政務修舉巡按
山西監察御史何贊亦奏稱天下之州邑得進士爲
之長令者不勾十之一二緣進士額數太少任使不
充伊欲救弊圖治非增科額誠爲不可乞要倍加甄
錄授之各省疲弊要害阜繁州邑以隆聖治所據各
官論奏相應備列上請其取士額數例該本部臨期
奏請取自上裁臣等不敢擅擬伏乞 聖明定奪嘉
靖十七年二月二十二日奉
聖旨是只照上科取三百二十名

叅看廣東試錄文字

據廣東布政司進呈嘉靖十六年鄉試錄查得前序
內聖謨帝懿表內玉牒金枝四郊上帝朱掖宸樞社
稷等字俱不行擡頭及序內稱陳白沙倫迂岡等字
樣俱屬失格臣等切惟三歲開科取士國家重典各
省試錄進呈御覽傳布四方關係甚大其所錄文
字必醇正典則以示士子之法程其體式必虔恭敬
慎以昭聖朝之儀度叅看得廣東布政司鄉試錄
內擡頭字樣差錯數多顯是不行敬謹古者君前臣
名父前子名朋友則稱以字近來士俗競以號稱已

失古人稱字之意然止同輩私相稱謂而已今前序
內陳白沙倫迂罔之號豈可輒對於君父之前及策
問兵戎詞多隱晦至於四書義經義及論等作尤爲
詭異不經之甚臣等仰惟 祖宗定設科目革前代
詩賦弊習專以經義取士作文悉依朱氏傳註必理
明詞達不失題目本旨方在所取 國家成化弘治
間程文俱深醇典正明白敷暢近年以來士大夫競
慕新奇務爲險僻背盤經旨決裂程式純正爾雅之
體優柔昌大之風蕩然無有嘉靖十三年八月該本
部題爲變文體以正士習節奉 聖旨是文運有關

國運所係不細近來士子經義詭異艱深大壞文體
誠爲害治僉部裏使出榜曉諭今次會試文卷務要
醇正典雅明白通暢的方許中式如有似前鈎棘奇
僻痛加黜落甚則令主考官指名具奏處治欽此通
行欽遵去後臣等看得廣東錄內中庸義自原題以
至終篇全不說破是子思之言其曰體存故可以厚
本用利故可以明漸厚本故可以合同明漸故可以
鼓舞錯雜謬妄全非作義體式批語謂中和不可分
動靜位育不可分中和大悖經傳未發已發心正氣
順之旨孟子義結末飛衛紀昌相遇交射是乃列子

之寓言詎宜引之以亂聖賢之雅道書經義二篇漫
衍無倫畢命一篇全不說出康王命畢公之由不知
爲何而作至論內黃郊紫微二君碧虛子之問詭異
尤甚此如漢賦中假托亡是公烏有先生之類是徒
知眩博以爲奇而不知戾道亂正之爲害四方學者
將謂如此文字可得高選必更相倣慕日甚一日將
見文體大壞學術日微欲得真才以輔成治理豈不
難哉仰惟 皇上大明理學崇雅抑浮此等所宜深
絕而痛革之者也叅照考試官學正王本才訓導郭
愷同考試官學正黃仲陽教諭蔣孟倫林人紀陳玉

郝光潤王蘭各以儒官應聘主試却乃體式罔知實
上違於制典文詞多謬敢自叛於經常責有所歸罪
奚容追及照巡按廣東監察御史余光職主監臨事
專場屋提調官廣東布政陸杰左叅議余鏐監試官
廣東按察司按察使蔣淦副使鄒守愚各有釐襲之
責均失校對之詳俱各有罪合候命下本部移咨都
察院轉行各處巡按御史將考試官王本才等二員
同考試官黃仲陽等六員通行查提到官問擬應得
罪名奏請發落仍將原受禮幣銀兩追奪還官以警
將來左布政使陸杰等按察使蔣淦等四員行巡撫

兩廣都御史提問發落其御史余光係在京官員取自聖裁仍令臣等備行南北直隸提學御史各布政司提調官各按察司提學官行令各該府州縣儒學嚴加禁革今後應試文字務遵舊式以經傳爲主不許引用莊列諸子荒唐恠誕之說以亂聖經務使文詞不變庶幾他日科目得人可副國家之用矣嘉靖十六年十一月初八日奉

聖旨是王本才等并黃仲陽等都着各該巡按御史查提了問禮幣追奪還官陸杰等及蔣淦等着巡撫都御史提問余光送司提了問便通行天下提學官

嚴加禁革士子敢有肆爲恠誕不遵舊式的即行革退

叅看應天府試錄失格

應天府進呈嘉靖十六年鄉試小錄九月二十一日
通政使司封進二十二日奉 聖旨這小錄內考官
如何不填名禮部叅着了來說不許支對欽此臣等
竊惟國家三歲一開科選士其典至重而兩京則命
文學儒臣以司校文之任其責爲尤重試錄進呈所
以獻達宸旒對揚休命錄內考官批語於例俱該填
名方敢上進蓋兩京十三省皆然臣子對上之體罔

敢弗欽當如是也。叅看得應天府進呈小錄內考官批語俱各不行填名顯是不知敬謹叅照考試官左春坊左諭德江汝璧司經局洗馬歐陽衢各以儒臣欽承簡命所宜竭心效勞協力程事却乃臨時弗慎自取愆尤相應罪治以懲弗恪提調官應天府府尹孫懋府丞楊麒責任既同均難辭咎及照同考試官學正舒文奎錢舉教諭周隆盛徐州唐尚忠歐陽烈梁士翹張禹卿訓導楊忠孚各有分考之責通合查究合候命下之日本部移咨刑部候左諭德江汝璧洗馬歐陽衢到京之日行提問罪及咨南京刑部將

府尹孫懋府永楊麒就彼提問通行奏請發落其湖
廣沅州學正舒文奎等九員本部移咨都察院轉行
各該巡按御史將各行提到官問擬應得罪名照例
發落以警將來再照監試官南京江西道監察御史
何宏河南道監察御史沈應陽與有監臨之責於封
錄進呈既有前項差失乃各不行糾舉亦屬有罪合
無行南京刑部一體提問惟復量加罰治均乞 聖
裁嘉靖十六年九月二十四日奉

聖旨這進呈小錄考官既不填名策題又以國家祀
戎大事作問所對中間語多譏訕好生無禮江汝璧

歐陽衢錦衣衛差官校挈來問孫懋楊麒并何宏沈
應陽着南京法司提了問同考官舒文奎等着各該
巡按御史提問取中生儒都不許對制你部裏不行
衆出顯是回護本當查究且饒這遭

應天府取中生儒乞准送監讀書

據王諷等各告係直隸徽州等府祁門等縣軍民等
籍各蒙 朝廷作養由廩增附生員中應天府嘉靖
十六年鄉試誤以草茅庸昧干冒 聖明欽奉 聖
旨不許對制欽遵外今會試事畢諷等各洗心悔改
願切補報所有原抄取中文字公據理合告投伏乞

轉奏庶得補報等因到部臣等看得應天府取中生
儒一百三十五名俱以草茅微生幸蒙朝廷作養緣
考官以祀戎作問所對中間語涉譏訕已該臣等遵
照明旨不許對制但各處試錄程文多係考官筆
削其主考等官已經奉有欽依究問處治我皇上
深得夫激厲人才懲革士習之道矣今各生咸知洗
心悔改願切圖報會試已畢方將公據告投前來情
詞懇惻伏望皇上少霽天威念涵濡之久作養之
難俯賜矜宥容令臣等將各生俱送國子監讀書令
其改習三年方許會試是真天地無棄物聖人無棄

人之仁也恩威出自朝廷臣等不敢擅擬伏乞 聖
明定奪嘉靖十七年三月二十五日奉
聖旨准送國子監讀書

應天府生儒乞准令會試

臣等看得應天府嘉靖十六年取中鄉試生儒王諷
等一百三十五名先奉欽依都不許對制續該本部
題奉 聖旨准送國子監讀書仰見 皇上激勵人
才懲創之義優容之仁誠爲兩得今照各生入監肄
業坐班已滿 聖化陶鎔師儒督正必有以改其舊
習而成其學業矣茲當會試之期合無容令入試以

備選舉其有事故先未入監近日方纔到京送監者似未經作養應令遵照前旨仍令坐監肄業以俟下科會試嘉靖二十年正月十六日奉

聖旨是這生儒入監坐班的准入試其有事故未經作養還送監肄業以俟下科

南宮奏議卷第二十一

南宮奏議卷第二十二目錄

邦典

進繳 御製寶璽文式札子

大閱大射禮議

奏進樂書乞興正樂議

南京大 朝賀出制帛及百官相遇禮

請纂修興都典制及承天府志

申明士庶家冠婚喪祭禮

南宮奏議卷第二十二

鈴山堂集六十二

邦典

進繳 御製寶璽文式札子

嘉靖十八年二月初五日該本部尚書臣高於重華
官欽奉 面發札子一道 欽定成造御寶一顆見
方一尺五寸九分文曰奉天承運大明天子寶五顆
俱見方九寸五分文曰天子信寶天子行寶皇帝信
寶皇帝行寶大明受命之寶五顆俱見方七寸九分
文曰巡狩天下之寶垂訓之寶命德之寶討罪安民
之璽勅正萬邦之寶欽此恭捧到部臣等切惟符璽

之制自秦漢以來天子印得稱璽故其制謂之璽書
所以正位凝命世爲傳守者也仰惟 皇上睿知先
天聖謨憲古百凡制作俱盡善美爰以 本朝璽寶
未備特勤宸思親煥帝文立義定名各有攸當大聖
人之所作爲卓冠千古傳之萬世永永而無極也臣
等曷勝欽仰之至謹恭錄 欽製文式即行內府該
衙門擇吉恭造施行原奉 御筆札子一道理合進
繳謹具題知

大閱大射禮議

該禮科給事中陳棐題臣等會同兵部尚書毛伯溫

等議得其一曰大閱之禮臣等竊惟周禮中冬教大閱古者四時因田講武滅僖伯謂治兵振旅以數軍實昭文章明貴賤辨等列順少長習威儀也春秋書大閱公羊傳曰大閱者何簡車徒也蓋自軒轅用干戈征弗享以來三代聖王皆以武功爲重故周公言於成王曰克詰戎兵召公言於康王曰張皇六師詩頌殷高宗則曰殷武奮伐美周宣王則曰車攻馬同有由然也漢唐以下雖治不古若然漢承秦制十月幸長安水南門五營士爲八陣進退東漢制以立秋日斬牲於郊東門武官肄兵習戰陣之儀唐太宗閱

武城西玄宗講武驪山之下徵兵二十萬親擐戎服
臨觀宋太祖講武近郊太宗築講武堂於西郊而唐
開元禮皇帝講武儀注特盛誠以文武之道不可偏
舉五材之用難以廢一此數君者亦知夫古先哲王
所以制治未亂保邦未危良必有此以爲長久之道
也洪惟我 太祖龍飛淮甸間關百戰汛掃胡元我
成祖親率六師北征殘虜雖大閱之禮今不可考
見然臣等伏讀大明會典內一款開載洪武六年定
教練軍士律凡騎卒必善馳射及鎗刀步兵必善弓
弩及鎗凡在京衛所每一衛以五千人爲則內取一

千人令所管指揮等官領赴御前試驗以次輪班在外都司衛所亦然至於箭步鎗法俱有定式而以其能否爲之賞罰有差其所致意於武備者如此蓋我二祖神武聖文兼致其用是以豐功偉烈遠出前代之上而不可及者也仰惟皇上臨御以來稽古右文制禮作樂追法二祖獨冠百王文教之盛誠巍然煥然不可加矣邇者北虜敢肆跳梁深入三晉上厯宵旰之慮凡在臣工固嘗思所以振揚威武之方今團營務頗弛廢雖有操練之名而無簡閱之實將帥不習本業士卒徒存虛數老弱坐耗軍實壯強

被役私門倘蒙渙發綸音大講武事 聖駕親閱視
其舉廢以加賞罰則 聖意所加自足以作將士之
氣而天威遠播尤足以寒氍裘之膽此國之大事在
今日所當務者也合無俯從所言令臣等開具合行
儀注上請聖裁行令各衙門修理道路將臺旗鼓器
械等項完備恭請 大駕幸臨閱武大教場舉行古
今之曠典以成安不妄危之道而文事武備兼舉無
遺矣伏乞 聖明採納勅下施行其一曰大射之禮
臣等竊聞古之射禮有五而大射爲重周禮天子將
有郊廟之事行大射之禮天子大射天官司裘供武

侯熊侯豹侯設其鵠夏官射人以射法理射儀其大射曰射侯者射中則能服諸侯故曰射者所以觀盛德也是天子親行之禮也儀禮曰大射之儀君有命戒射宰戒百官有事於射者射人戒諸公卿大夫射司士戒士射又古者將有祭祀王命諸侯卿大夫射中者則與祭諸侯貢士於天子天子試之射官中多者而君有慶益以地中少者而君有讓削以地是天子之命臣射亦曰大射然必天子親行於上而公卿大夫從之臣等又聞之記曰天子將祭必先習射於澤已射於澤而後射於射官注曰澤澤官也所以擇

賢之宮也射宮國之小學在西郊則虞庠是也此皆
謂行大射禮之地也自周而下若漢明帝臨璧雍行
大射禮唐太宗屢賜群臣射於武德等殿宋太宗詔
定射禮爲大射圖而唐開元禮有皇帝射於射宮皇
帝觀射於射宮三月三日九月九日賜百寮射儀注
尤詳書曰侯以明之易曰弧矢之利以威天下故明
乎其節之志以不失其事則功成德行立無暴亂之
禍而國家安者此也洪惟我 太祖 成祖平定安
輯之初嘗令群臣合射及詔成均博士弟子郡縣庠
序之士習射於射圃各制禮儀臣等伏讀 大明會

典內一欵洪武三年定凡遇郊廟之祭先期命文武官行大射之禮其儀按周禮大司馬之職今以兵部掌之自天子皇太子親王以至文武官射禮各有等差其射鵠有七自虎鵠五彩而下以至布鵠無彩其射中有五自皮樹中而下以至鹿中其職事官有八曰司正司射司射器舉爵請射待獲執旗引禮是其儀物大備典章具存而大明集禮所載圖說尤詳但行禮之處不可考見今給事中陳棐以大射爲言而特主於臣下不忘武備之意且謂擇廢寺閒地倣古澤宮射宮及照國初射圃之制創圃數區令文職官

輪日更番入射是亦欲稽考藝能以求文武之才固
爲有見但未及車駕親臨則與古人所行及會典
所載大射禮似未盡合且各官皆有本等職業若令
群聚學射不無有所妨廢臣等查得嘉靖十五年四
月內該本部尚書夏言欽奉 面諭大興隆寺前諭
輔臣宜改作講武堂雖是兵事然係典禮卿部裏可
具奏來欽此已經會同兵工二部議擬題奉 欽依
建置至今尚未舉行蓋以財力未敷之故臣等今看
得前項地基闊敞夷曠如欲建置澤宮射宮似於此
地爲宜但目今方當殫力 廟建難以併舉所據大

射禮儀合無恭候廟工完日另議請施行其兩京國
子監及各省府州縣學校射禮合再申明 國初定
制務俾及時暇隙着實舉行則與周禮賓興六藝大
學造士行同能偶別之以射之意亦爲有合而士於
未服官以前皆得習射而一代之典亦可漸備矣嘉
靖二十二年正月二十七日奉
聖旨且罷

奏進樂書乞興正樂議

本部於禮科抄出新選山西遼州同知李文察奏臣
聞諸周禮奏黃鐘歌大呂舞雲門以祀天神奏太簇

南齊書卷三十一
歌應鐘舞咸池以祭地示秦夷則歌小呂舞大濩以
享先妣奏無射歌夾鐘舞大武以享先祖聞諸詩肅
雖和鳴先祖是聽聞諸書舜命夔典樂教胄子自古
聖帝明王未有舍是而能以化成乎天下者矣

陛下之聖德復古樂於今日正所急之先務也故敢
將順其美於樂記而有補說之作以足陳澔集說之
意所以明樂理也於律呂新書而有補註之作以發
蔡元定之蘊所以明樂聲也於伏羲卦圖文王卦圖
夏禹九疇圖箕子洪範圖而有解說之作所以明樂
理之原也於興樂而有要論之作所以明古樂必可

興於今日也不揣愚賤瀆冒奉獻以爲興樂採擇之
備覽且四聖圖中非徒寓乎樂理體無不具用無不
周有養身之術焉有正心之方焉有脩身之要焉有
行政之道焉故臣又作四圖用說第一圖用說所以
保聖躬也第二圖用說所以明聖心也第三圖用說
所以一聖動也第四圖用說所以直聖政也爲此將
臣所撰四聖圖解二卷樂記補說二卷律呂新書補
註一卷興樂要論三卷共二帙親齎謹具奏聞等因
奉 聖旨禮部看了來說臣等切惟我 太祖高皇
帝定鼎之後奉奉以復古樂爲念但時當草創欲爲

未就仰惟 皇上以義黃堯舜之德際重熙累洽之運期值百年聖無述作既制大禮以定天下之式必作大樂以平天下之情但樂之道廣大微妙非惟情義難明而其所謂制度者亦失傳久矣西漢去聖未遠樂家有制氏世在樂官但能記其鏗鏘鼓舞而不能言其義况數千載之後乎今遼州同知李文察奏進樂書乞興正樂一節臣等看得其所進樂記補說補註等書所以明樂聲樂理樂原亦有前人所未發者其議於人聲中考定五音以爲制律候氣之本其法似爲徑截昔宋人楊傑議曰八音皆不能無失惟

人稟中和之氣而有中和之聲八音律呂宜皆以人聲爲度且人言人志詠以爲歌五聲隨歌是爲依永律呂協奏是爲和聲此皆取之虞書者也李文察所議似與此合惟我皇上聖德居位懋建中和之極實秉制作之權則考定元聲興復雅樂今日實惟其時但考制習文非朝夕所能湏積之歲月然後可以成功所據本官陳奏相應議處合無暫以原職留京與支本俸太常寺選委典簿等官熟知音律三四員并選能歌樂舞童生百餘名開設樂館聽本官協同肄習待其稍有次第每季終本部委官同該寺堂上

官按試一年之後本部堂上官再行按試如果聲律諧協雅俗判殊及截管飛灰吹律候氣皆有應驗奏請定議擢用伏乞 聖裁嘉靖十七年六月初四日奉

聖旨是李文察改授太常寺典簿協同該寺官肄樂南京大 朝賀出制帛及百官相遇禮

該南京禮部尚書霍韜奏奉 聖旨禮部查明來說欽此臣等查得先該南京禮部尚書霍韜奏爲申明禮制以定體分事該本部看得所奏三事其一曰大慶儀凡遇元旦冬至及 萬壽聖節南京文武百官

俱行呼蹈十二拜禮臣等查得南京衙門凡遇二天
節前期進奉表文已行全禮至日止告天祝壽行八
拜禮此係 太宗皇帝欽定禮儀及奉有 英宗皇
帝聖旨具載 英廟實錄 祖宗舊典難以輕改所
據慶賀諸儀俱應從舊其二曰出制帛南京舊例每
年出制帛二次其日文武百官吉服導送於郭門之
外尚書霍韜議欲每歲止送制帛一次及南京官導
送則北京官宜迎臣等切惟制帛以備郊廟禮神奉
先之用事體崇重使者啓行導送出郭乃人臣致命
之恭南京官員導送於禮允宜到京之日進送內府

交收舊無奉迎之例所據前議亦合從舊其三曰百官相遇相臨禮尚書霍韜奏曰去年臣具奏官員相遇迴避之禮都察院會同禮部覆題六科相遇部院三品以上官引馬遜避今途遇給事中未嘗見其迴避又曰行且避路坐必避位宜照會典申勅遵守臣等查得都察院會題六科給事中與三品以上官公聚序坐如刑部會官審囚給事中坐於西班之後禮部會議民情給事中坐於西傍此會典所該載者教場比試選官賜酒飯又有並坐對坐之禮爲會典所不載者中間事體俱已明備無容再議以故臣等照

依都察院會題申明禁約今後六科給事中務宜遵照先奉 欽依崇讓遵制有故違的叅奏治罪題奉 欽依准行外今尚書霍韜奏稱該司郎中陳箴增減緊關情節切惟本部覆題既與都察院會同原奏無異本內又明開刑部會官朝審禮部議民情俱有定規此即會典所載其序坐之詳部院會同前奏已備今次覆題中間並無增減緊關情節但百官相遇相臨禮既經本官節奏前來相應再行申明禁約令各遵守施行嘉靖十六年七月二十四日

請纂修興都典制及承天府志

臣等看得承天府知府吳惺等奏請纂修興都典制承天府志以俟收入一統志內及圖上純德山形勝與顯陵規制進呈御覽以慰孝思各一節臣等謹按周禮惟王體國經野設官分職有外史以掌郡邑之志所以大一統通四方爲民極焉故夏作禹貢周述職方所由來遠矣我朝稽古建極有一統志各省有通志郡志縣志以紀職方蓋取諸此惟承天府實我皇考睿宗獻皇帝始封之國我皇上龍飛之邸又今爲二聖萬年陵寢之所也宜有紀述以昭示無極據稱欲將興都典制與承天府志各

爲一書意以興都大典疑非府志所該然禹貢並叙九州而專統於帝都書法凡例體裁有則固不嫌爲一書也況近例金陵志中都志亦爲一書今日承天有作宜爲興都一志其法則先興都宮殿陵寢諸典而後及有司所守其義則取諸禹貢以示有尊庶爲合理其純德山形勝 顯陵規制法得區列爲圖載于志之首再據更欲繪圖以便揭之殿壁用慰 聖孝瞻覽之思亦應依擬但前項書籍總裁分纂尤在得人爲照見督工今陞工部尚書顧璘素以文學著稱足當筆削之任合無行令不妨原務督率該府有

司聘委文學官儒不拘見任家食分局修纂而璘特
爲總理侯脫橐之日繕寫成帙進呈 御覽或下內
閣看詳恭請 聖明欽賜裁定然後本部轉發翻刊
成書傳布四方付之史館別議增入一統志內庶足
以成一代之典而於 聖孝聖政昭示爲無窮矣嘉
靖二十年二月十九日奉
聖旨依擬

申明士庶家冠婚喪祭禮

看得南京兵部尚書湛若水奏內申禮制以馴民俗
一節臣等爲照冠婚喪祭所以綱紀人道始終乃王

教之大端化民之首務也仰惟 皇上御極百度俱
新道德齊禮之治既惇嚮風承德之效自應況留都
首善之地卿士大夫之家服行禮教固罔或愆其間
閭閻細民庸有不能如禮制者亦力有所不逮也至於
喪事或失則奢祀事或失則怠習俗相踵習義漸乖
今尚書湛若水具奏前因無非欲明禮制以敦教化
之意相應依擬其前項禮儀朱儒朱熹著有家禮傳
世繁簡得宜士民兩便合候命下本部移咨南京都
察院出給榜文張掛曉諭士庶之家悉訪家禮儀式
舉行如冠禮年十五至二十者皆可冠務筮戒賓客

延聚親隣少長共觀之使知成人之義昏禮如問名
納吉不行已久止倣家禮納采納幣親迎等禮行之
所有儀物二家俱無過求以傷和好其喪禮各稱其
家之有無以爲厚薄時忌致祭亦各隨所有以伸
慕不以富侈不以貧廢山外嚮宴奢靡服飾僭踰排
筵散悶剪綵靡費等項如本官所云者通行禁治巨
家大族能遵禮着實舉行以爲細民之倡者有司量
加勸勵庶幾日改月化古禮漸興道德一而風俗同
者在是矣嘉靖十八年十一月初六日

南宮奏議卷第二十二

南宮奏議卷第二十三目錄

官政

申明職掌以杜請託

查革譯字生先年貢緣姦弊

申明慎選通事

停止投告補役醫丁

太醫院官醫暫免三年類考令照舊習學

覆題太醫院徵解拖欠藥物

議處光祿寺厨役

議止光祿寺揀選守門人役

陝西布政司遲例解到厨役發回究治
議處各處僧徒

奉 旨叅看三法司會審過期

南宮奏議卷第二十三

鈴山堂集六十三

官政

申明職掌以杜請託

臣等切惟國家設官分職各有司存如行人之設專以奉使爲職查得大明會典行人條例項下內開凡開讀詔赦等事例該本衙門官差遣不許別衙門侵奪如臨時乏人方許別官兼差而朝廷用此稽其年勞以爲功課訪其辭受以觀廉節驗其行事臧否以爲黜陟所以人皆砥礪畏慎爭思自樹以期將來華要之選節年本部遵守定制凡遇頒詔并各王府

祭葬齋勅獎勵俱例差行人其每歲冊封宗藩則翰林六科官及卿寺五品以上官亦得充副使與行人相兼差用而別項官員不得差遣且如光祿寺署丞等官職專供膳鴻臚寺序班等官職專朝儀內閣兩房中書等官職專書寫各部司屬等官俱有部事而刑部大理寺職專刑名俱難擅離於例不應差用近來各官求借差遣圖便回家營殖私計延住經年不行復命近該大理寺寺副王應芳等齋詔開讀過限一年之上方纔回京已該本部具題叅問外然本部裁制雖嚴人情求討無厭每遇一差而數人爭之奔

競成風職掌侵紊甚乖事體理合題請申明今後除冊封宗藩照例於翰林六科等衙門行取相兼上請點用外其餘一應差遣本部照例先儘取行人如行人不敷然後訪取各衙門空閑官員量情借差不爲常例其今科辦事進士方入仕途遽懷私念亦合通行禁革合候命下本部備行各該衙門官員一體遵守知悉仍行各衙門堂上官各要嚴轄戒諭不得縱容所屬託故求回此亦正士習儆官箴之一大機也再照行人出差自合遵限前來供職却亦往往回籍久住以致本衙門差用乏人啓各官侵擾之弊此

緣所司徇情弛法批限太寬伏望 皇上勅令該科
務照先年原定地方水程嚴立限期仍候命下本部
移咨都察院轉行各該巡按御史今後公差官員枉
道過家遷延久住者聽各該巡按御史指名劾奏前
來以憑究治如此則法令昭明官守無曠差遣畫一
而請託可息矣嘉靖十七年七月二十七日奉
聖旨依擬

查革譯字生先年貪緣姦弊

儀制清吏司案呈准翰林院手本開稱四書館韃靼
等九館譯字生除給假丁憂事故問革等項不開外

見在肄業譯字生叢德等七十五名監生曹金等五
名俱於嘉靖十六年五月二十日到館習譯三年已
滿例該會考食糧等因查得嘉靖十六年五月內該
大學士李時等題准本部考選得監生王世業等十
四名世業子弟福守仁等九名軍民子弟朱光祖等
九十七名俱年貌相應題奉欽依送翰林院分撥各
館肄業去後又查先年節該本部題准事例譯字生
習學三年後本部會官考試中者作食糧子弟月給
米一石不中者許過三年再試不中者許過六年三
試不中者黜退爲民中者照例食糧又查得嘉靖元

年八月內該本部題覆爲嚴規制以成譯學事議得各館官生凡送考食糧等項不中俱有再試之例但中間委有愚頑不學屢考無成若仍容再試終於無用合無今後習學三年考不中者徑黜爲民其有資稟年歲相應量終有成者聽翰林院酌量方許再試等因題奉 聖旨是准擬欽此俱欽遵外今該前因看得翰林院開送四夷館鞦韆等館譯字生叢德等共八十名俱於嘉靖十六年五月內送館習譯三年已滿例該會官考試食糧一節各照先年事例引赴午門裏翰林院出題會同各部并都察院堂上官及

諸曉夷字官員考試合用監察御史二員監試錦衣
衛量撥官校看守試畢將考試過等第緣由另行奏
請定奪等因題奉 聖旨是欽此會考間續於禮科

抄出少保無太子太保禮部尚書武英殿大學士掌
部事嚴 題為考試譯字生乞賜查革先年貢緣茲

弊以正國法以清士途事內開臣於近日訪得數內

郭元梓郭元材曹金田稷王詔蔣縉喻承恩張述朱
光祖李宏陳樾張宗召潘儒劉鎰龐棟俞縉戴鏞韓
景隆翟廷相蔡廷相陸九思柴可禎柴志學委係京
師富商巨室先年鑽刺夤緣玷汚名器乞將郭元梓

等二十四名不許預考徑自革退爲民此外各生尚
多宦家子弟比之商賈雖若有間大抵屢經論議若
再稽之終於事體有礙合無盡數黜革以正士風惟
復嚴加考試其譯字差繆者照例革退爲民或業有
頗通量爲留用十數名以充任使等因奉 聖旨覽
卿奏朕具知悉郭元梓等二十四名納賄夤緣情實
可惡本當究治姑從輕都革了役着爲民其餘嚴加
考試務要譯業精通量爲留用該衙門知道欽此除
將郭元梓等二十三名并未經起送郭澣一名俱革
後爲民今將見在叢德等五十名引赴午門裏考試

內除西番館譯字生一名張麒失落題紙已該監察御史石永等叅究外考得靖九經等十五名譯業精通合無准送翰林院照依先次題准事例月給米一石仍舊在館習學辦事貢持國等十五名譯業精通資稟年歲尚堪策勵姑准送館習學不許食糧候三年滿日另行再試劉承祖等二十三名譯字差繆習學無成及楊蓉馬銳劉汝勤臨考不到顯是畏避考試俱合革退爲民通候命下欽遵施行嘉靖二十一年十二月初六日奉
聖旨是

申明慎選通事

先該鴻臚寺卿魏境等題該本部覆題議得各國通事除丁憂緣事未結俱不作缺其有見缺十人以上及一國全缺者鴻臚寺呈缺到部本部奏行各邊鎮巡官訪保及劄付鴻臚寺掌印堂上官出給告示許在京在外各真正籍貫俊秀子弟二十歲以下平昔身家無過者赴寺報名該寺徑行各該印信衙門保勘是實類總具本寺結狀粘連各人親供呈送本部仍行該城兵馬司拘集隣佑人等取具不扶結狀到部覆審相同選揀人物齊整語音洪亮之人再行考

試文義一篇律判一條務要文理通曉字畫端楷者
每缺一人奏送該寺分派各國年深老成通事教習
如本國無人許其自行從師受業或令隣邦通曉者
教習待其習學一年邊方訪保到部通行試以夷語
將精通夷語之人照缺收補戴平巾辦事三年考中
支米辦事六年考中冠帶支米辦事九年考中咨送
吏部受職其頗通夷語之人仍令習學候缺考補如
習學一年夷語生澁不通者就行黜退發回原籍當
差不許妄稱守候年久奏告濫收如勘結人員妄將
身家有過改名冒籍之人朦朧妄保者事露連坐以

罪題奉 聖旨是欽此通查到部看得通事之設專為引領夷人朝見整肅儀度譯審語音千係至重收選貴嚴今查得各館見無員缺而候缺通事一國多至三人緣初止憑邊方保訪前來未經本部考試文義暫送鴻臚寺習學見今各邊陸續起送到部人役數多難以濫收所據本部先次覆題鴻臚寺卿魏境等題稱前因頗為切當但法久弊滋因循玩廢合再申明舉行嚴加條約除將已送鴻臚寺候缺通事未經本部考中具題者俱照舊例分派各該館年深老成通事習教夷語本部及提督主事時加考校候有

貢缺臨期試以文義語言研審去取量爲收補今後
不許貢緣告擾濫行訪保務要遵照前例見缺十人
及一國全缺者方許鴻臚寺呈缺到部具奏訪保考
送該寺教習施行仍戒飭在館通事序班人員格脩
職業互相教習其辦歷辛勤素行端謹夷語精熟者
該寺具奏量加秩俸如有恣肆曠廢唆誘夷人爲非
受賄作弊抗違該司提督官約束者俱聽本部指名
叅究待各官考滿考察之日填註賢否咨送吏部以
憑黜陟庶幾選擇既嚴稽考亦當而官屬亦奮於効
用矣

停止投告補役醫丁

臣等看得太醫院醫士見在人數倍於常額已爲冗濫而近來告稱補役醫丁之輩日逐纏擾不已緣此輩非真能知醫多係外省罷閑吏役黜退生員潛住京師夤緣鑽刺藉以爲容身干祿之途而其曰某祖某人戶籍俱係朦朧詭寄漫不可考此緣先年部議停止訪取明醫事例却冒認姓籍告稱補役醫丁古語曰弊源如鼠穴彼塞則此開正此之類謂也若不嚴加禁革冒濫之弊靡所紀極間有官醫子孫雖稱的派相傳實於術業無取一槩補收亦不過虛糜廩

食而已本部查有先次題奉欽依又據該院所呈理
合申明題請今後告補人役合無一例停止待該院
缺人供事之時另行呈請收用敢有仍前告擾者聽
本部叅送治罪其果係官醫親男第姪亦合行令該
院省令習學本業務極精通不許陸續投告亦候該
院缺人呈請方准赴部具告收考如術業不精照例
爲民當差不准替役仍自嘉靖十九年四月爲始備
將各籍開造花名文冊呈送本部以憑查驗臣等又
訪得每當科舉之年京官子弟隨住京師者往往冒
認醫籍以圖入試之便今照科場在邇亦合嚴禁此

弊以正士風俱候命下本部一體禁革施行嘉靖十九年四月十八日奉

聖旨是

太醫院官醫暫免三年類考令照舊習學

祠祭清吏司案呈案查嘉靖十一年該本部題稱合將官醫通令習學本業按季考試每週年終劄令該司官前去會同考校三年滿日通送本部督同本院堂上官嚴加考試一等送御藥房供事二等給與冠帶與考居三等俱發本院當差遇有御醫吏目員缺送部再考御醫於吏目內銓補吏目於醫士內銓補

良醫大使等缺於二等人內考補等因題奉 聖旨
是欽此今照該院官醫習學已經三年例該嘉靖十
六年終類考等因案呈到部看得太醫院習學官醫
又該三年類考但各醫雖有習學之名然自棄者多
留心者少專候考試之期圖爲陞授之地及至臨病
用藥殊鮮竒術真才查得該院見在御醫吏目等官
及 聖濟殿供事人員節年考送倍於常額已爲冗
濫所據今次類考相應暫免仍令再習三年以責成
效合候命下本部行令該院將見在官醫照舊習學
每年終本部劄令該司官前去會同考校候後供事

人員缺乏然後通行送部考試遇有員缺照例以次補授庶術業得以專精名器不爲冗濫而倖進之風可少息矣嘉靖十六年十二月十三日奉

聖旨依擬

覆題太醫院徵解拖欠藥物

看得太醫院掌院事通政使許紳等奏稱近年各處藥材拖欠數多不行解納惟四川蘇州雖有解到俱係藥價到京買納以致藥性不真供應缺乏乞要將朝覲官吏查究徵解一節爲照太醫院藥材所以上供御用調護 聖躬所資甚重 國家立法各該地

方俱有額設採辦亦求地產真正庶乎性味不差治病得以獲効今各處藥材節經本部題奉 欽依嚴限查催往往不行依期解納其四川蘇州係產藥地方積欠尤甚嘉靖十四年等年却又徵解折價銀兩前來節據管解人員告稱萬里程途往返受累雖經從宜准令在京召商買辦終是藥性不真用之罔効甚非臣子仰體 君上衛生慎疾之義今行據太醫院回稱自嘉靖十四年起至十六年止各處拖欠藥味俱未解到各該有司明知奉有前 旨却乃視爲泛常恣意延緩既該具奏前因將遲悞拖欠藥材漸

江等布政司應天等府來朝官員於考察畢日行提
究問庶法守獲嚴人心知警嘉靖十七年正月初二
日奉

聖旨這藥材拖欠數多誤事官員本當鞫問姑從寬
着各該巡按御史查提問罪以後都着徵解本色不
許折價

議處光祿寺厨役

該戶科給事中楊傑題爲酌時宜明舊法以裨國用
事近聞光祿寺添補厨役一百五十名每名月給米
一石選數既多謀充必濫城市廝養之徒皆得寅緣

聚食於太倉月將萬計歲計十萬餘矣且見在厨役
四千通融差使亦自有餘乞將新收厨匠差官精選
如果技藝通曉量留應用係廝養無藉盡行革退仍
將月糧分別新舊亦行裁減等因奉 聖旨該衙門

看了來說欽此案照先據光祿寺掌醢署厨役葛昇
奏爲急缺厨役供應不敷事該寺議稱掌醢一署獨
爲徧累本部議准量添厨役一百餘名於嘉靖十六
年九月初六日題奉 聖旨是欽此委官選補間今
該都給事中楊傑等所奏在寺厨役見今四千名通
融差用亦自有餘若使選補既多必致冗濫一節誠

節財惜費至意已經就行該寺查勘應否通融差用
去後今據該寺呈據大官等四署各申先年各署原
額廚役共有六千八百八十四名見今各署當差廚
役止有四千九十三名逃亡事故二千七百九十一
名比之原額之數損失已及三分近年以來添設

四郊 九廟并 駕詣 山陵比與先年舊制復有
增益以致事繁役少應當不前若欲四千人通融四
署之事則間有動作未免顧此失彼理合備由呈請
議處施行等因到部看得該寺呈稱大官等四署廚
役共有六千八百八十四名之數雖係先年舊額然

揆事圖治要在講求長策豈容牽杞舊文當因仍積習之餘而爲振勵變革之計此今日之務也况節年事例以奉 旨在後者爲准查得嘉靖九年九月間該禮科左給事中田秋等題准光祿寺厨役至不滿四千名者方將在冊餘丁頂補今該寺厨役既有四千九十三名未至不滿四千名之數 明旨具在近歲遵行未聞廢事雖稱添立 郊廟比於舊制有增要之舉事動衆各有其時未有重襲併積同日並會者也若使綜核其人夙夜在公宜無不足之理訪得四署官員將各役濫占跟用數多或因而差撥奉承

所私繫籍公家服役私室以致徃徃負累逃匿如此即使其數愈多愈不足用徒費廩粟之繼祇爲姦利之資但查掌醢一署缺人尤甚合無查照原議候命下之日本部委官將掌醢署先年報冊餘丁嚴加揀選年約二十以上藝業精良之人查無違碍量取七八十名撥補應役以後三署不許援例奏添背違

成名如違聽本部叅送治罪其有仍前私自差撥厨役奉承内外人員亦聽本部及巡視科道官查訪糾奏庶冗役不滋而供事無之矣嘉靖十六年十二月二十七日奉

聖旨是

議止光祿寺揀選守門人役

看得太監韋輝奏要將本寺守門人役覆行揀選常令着役免行闊撥著爲定例一節查得先年該寺因是容庇積年慣熟之人徼圖私便專一守門寫字搜檢巡風役既輕省不勞又得窟處其中緣爲奸利凡大小錢糧出入必有常例銀錢其重大繁難之事絕不相及以此人情爭欲求爲多或十數年不之改易故給事中田秋題請歲一闔撥互換無常所以嚴積弊之防均勞逸之節其法爲最公也今欲有所翻異

使利益安便之事常專於數十年狡猾之輩則勞者
竟無寧期逸者終身自適有乖舊例仍踵弊端所據
揀選廚役常川守門等項難以再議合候命下之日
本部仍行該寺遵照先年題准事例歲終更換施行
庶法守畫一無紛更寅緣之弊嘉靖十七年正月初
四日奉

聖旨這守門寫字人役既係科道官奏准韋輝如何
輒欲更改顯有徇私情弊本當究治姑從寬降一級
照舊辦事

陝西布政司違例解到廚役發回究治

據陝西布政司咨呈據延安府申批差鄜州大戶雷漢等管解光祿寺廵厨王欽補役又據本布政司批差延安府安塞縣大戶高小老管解僉補厨役王江妻樊氏各緣由到部查得嘉靖六年二月 詔書內一款太常光祿二寺厨役有廵亡者先年該寺奏准事例要將在冊餘丁揀選補役免行原籍勾擾最為兩便後又中止仍行原籍勾丁騷擾鄉民津貼盤纏小民憚於應役未久即廵有損無益禮部查原奏事理將廵故厨役冊內有果壯丁堪以替補者准令收役免行原籍勾丁若餘丁數少不敷照舊清解欽此

但法久弊生事弛人玩訪得各處每遇發下清勾文冊不行起解正丁多將聽選官吏監生人等家人冒頂厨役姓名却令槩縣津貼盤纏齋文赴京顧人頂補到寺不久即行逃避者有之亦有起解正身到京不服水土度日不過隨到隨逃者有之以致清勾文冊竟不停歲原籍騷擾迄無寧日該本部題奉 欽依行文二寺各查逃故厨役的確名數前來本部將見在冊餘丁精壯者盡數頂補逃故厨役行文原籍暫免清勾外此例已經遵行年久中外稱便一向未有題行原籍清勾者今據陝西布政司解到延安府

厨役王欽等於例有違難以收役叅照前項司府州縣經該官吏既奉前例自合欽遵乃敢背違成命往復人難蓋緣吏胥人等求索不遂以致朦朧稟白恣行勾擾每解者一人押解者兩人中間科害里甲津貼盤費其爲騷動何可勝言當此民窮力屈之時豈堪行齋居送之擾所據承行官吏俱屬有罪除將解到人役隨批發回省令照舊收管應當本等差徭外合候命下本部咨行都察院轉行陝西巡按御史將各該承行官吏問擬應得罪名仍行浙江等布政司南北直隸等府一體遵守今後非奉本部明文清勾

不許擅自起解違者一體叅奏治罪庶貧民得以休息不致重加負累矣嘉靖十七年正月十九日奉聖旨是

議處各處僧徒

該刑科給事中李泰題爲申明律例闢除異端以光聖治以資國用事臣伏覩大明律所載凡私剃寺院發邊遠充軍見行條例僧人府州縣各有名額私度者發口外爲民其創造房屋仍行拆毀并地基神像等物入官又查得近年以來欽奉聖諭申明此例有司不行用心但將寺廟暫改社學名色以應故事

圖完勘合其僧衆佛殿固皆無恙是以至今依然復其故物臣請今次嚴行各處撫按等官即將所屬地方僧人私度私剃犯該前罪明爲開諭俱係革前減免究問但令首改還俗許就於本地方仍以原住僧房該入官者給與永遠爲業其違制殿宇等項一應物料悉皆依律拆毀入官變賣如有司不行用心虛應故事者俱聽撫按官指名叅奏治罪等因到部臣等看得給事中李秦所題竊惟人君主張世道爲生民慮其功莫大於崇正闢邪而其施爲之方亦自有序宋儒胡寅作闢邪論曰太上立德以教變之其次

立功以法革之其次立言以辭闢之歐陽脩作本論亦曰救之之術莫若脩其本以勝之禮義者勝佛之本也夫佛爲夷狄自漢始入中國而其徒遂繁其教以寂滅爲宗其言近理亂真似是而非足以惑世誣民是故其害爲大若今之佛者則名存實亡已不能深造其師之說不過徒有宮室徒有像設窮民聚養爲圖衣食之計且服田輸租以供徭役亦王化中一民而已況我朝置設僧綱僧會有官私徧私度有禁維檢防革法制具備至我皇上以至聖之德居天子之位臨御以來建極敷言表明正道已足爲端

治變邪之本頃者詔旨頒行諭令僧人還俗一時歸
化之徒無慮千萬當此王政脩明之時禮義之教充
於天下所謂脩其本以勝之雖有佛無所施於吾民
矣今給事中李秦建言無非仰體德意務臻實効之
意但今各處水澇災傷若一切寺院槩欲拆毀誠恐
官吏奉行處置欠當不無騷擾之弊僧徒繁衆遽乏
安插不無流移失所之患且其估計變賣有司乘此
不無侵漁之私恐徒起事端無益也况各寺原有田
額賦役冊籍已定一時蕩拆便無歸着此皆所當慮
者合無候命下之日本部申明禁例行各該有司欽

遵 聖諭化正僧徒願自還俗者聽其自求安便各處寺院年久宮殿任其頽壞不許修葺民間童幼不許捨入爲僧私自披剃其有此等罪其父母及其隣佑此拔本塞源之道行之數年將見室宇日頽徒衆自散異端自息天下後世仰見 皇上至聖淵謨除闢廓清之功高出前古帝王之上矣仍容本部備查先年欽奉勅諭及本部歷年題奉欽依前因備咨都察院出給榜文轉行南北直隸各布政司翻刊摹印給散各府州縣在城在鄉張掛曉諭通令悉知欽遵施行嘉靖十六年十月十三日奉

聖旨依擬

奉 旨叅看三法司會審過期

該刑科題處決人犯緣由奉 聖旨這各犯屢審應
決之者但朕仰欽大報甫行謝典又迫近 大報本
當決了又今日補行吉禮有碍處置姑且都着原問
衙門取回嚴加好生刑具牢禁監候不許踈虞昔年
有旨着不許推延過期上逼冬至之日如何累不遵
奉三法司官并該科的禮部從重叅了來說欽此欽
遵臣等竊惟國家祀典以 大報天爲重大小臣工
俱當預期審肅以候供事一應刑名等項俱不許具

奏蓋所以欽天重祀仰贊我皇上竭虔之至意也
臣等查得嘉靖十四年十月初九日該三法司多官
會審情真重囚類題節奉 聖旨你每官稱執法專
一市恩大廢法義去歲以 郊祀不遠三旬如何又
待這時候方會審請旨來年着霜降之後即便奏請
欽此照得嘉靖二十一年九月初四日霜降節法司
自合欽遵前旨即便題請會審處決却乃延至本月
十五日方纔會審相隔十有一日既審之後該科選
延亦未即三覆奏請叅照刑部尚書吳山左侍郎葉
相右侍郎屠僑職司邦禁讞獄惟專却乃罔思勤畏

肆志遷延上逼大報冬至之日及恭遇崇報大典又適當補行吉禮方行奏瀆以致應決重囚有碍處置市恩廢法事屬故違法難輕貸都察院右都御史毛伯溫右副都御史周煦左僉都御史劉詡大理寺卿戴金左少卿楊行中左寺丞董珊右寺丞曾守約均係刑獄之司同有稽緩之罪及照刑科給事中劉三畏劉養直廖天明職係該科雖因崇報吉典而未敢覆奏然該部會審遲延而不行舉劾以上各官均合罰治以爲臣下慢事者之戒嘉靖二十一年十月十二日奉

聖旨刑賞大柄豈臣下敢擅專市私觀此一端則賞者亦非賢善秋後處決重因祖宗制守近累年暫停刑典多因仰逼大報之期如何累不遵奉測度朕意賣法市恩吳山等失職廢法劉三畏等扶同不舉好生蔑視國法且郭勛既問謂略其不軌之謀不軌罪名古今無略之之理既曰不軌却又擬按不合又今死於獄中是何律法本都當鞫問重治姑從寬處毛伯溫戴金等各罰俸三箇月葉相屠僑姑留用各降俸二級劉三畏等各降二級出邊方用吳山着爲民不許起復明年再違旨延遲定行重治不饒郭

勛已死這事情未有發落着三法司議擬來說該衙門知道

南宮奏議卷第二十三